

續金華叢書



續金華叢書



金華先民傳卷六

續金華叢書

永康應廷育輯

政事傳 凡七十七人

楊璇

張敦

蔣邵

傅柔

朱幼

陳脩

韓晏

厲文才

馮審

樓炤

吳傳

傅雱

蘇簡

賈廷佐

徐良能

范溶

葉衡

厲汪

喬夢符

楊大法

潘燾

葉介

章徠

孫祿

葉綦

石範

趙希伋

朱質

徐邦憲

李大有

葉秀發

喻侃

楊邁

徐雄

胡岩起

樓大年

胡仇

王夢得

陳琰

黃夢炎

許子良

范士表

唐韶

陳萍

吳直方

趙大訥

王餘慶

蘇友龍

吳履

馬廉

朱文

諸葛伯衡

李希明

朱肇

何士英

王應

朱仲智

王世榮

陳原武

陳俊

邢旭

邵玘

謝忱

杜瑄

朱勝

馮傑

盧詹

章聰

李敘

趙良

潘璋

黃傳

徐沂

章拯

潘希曾

徐讚

李滄

宋濂有言政事之於人大矣操厚倫敦俗之具執陽舒陰慘之柄御
賞善罰惡之權任出生入死之寄其在朝廷則四海被其澤其在一
郡則一郡仰其賜其在一縣則一縣蒙其福苟得其人則上明下淳
歌謠太平一或反是則流毒四海神怒民怨至或有激成他變者其
所繫甚重且難也蓋如此人能以一善自效于官者豈可使之泯泯

無聞乎縱曰往者之不可作寧不使來者之知勸乎嗚呼此紀載之文所以不可少也吾郡先達以政事著稱者奕世踵作隨其大小靡弗可書蓋不惟有益于當時抑亦有光于鄉土矣揭其表表鴻偉者別見名臣外越稽楊璇而下總得如干人錄爲政事傳其或軼出他書錄所弗及者博聞君子尙幸有以輔吾之缺云

漢楊璇字機平義烏人父扶字聖儀爲武源令遷交趾刺史所至有恩惠州人爲之謠曰楊聖儀政多奇璇舉孝廉歷官爲零陵太守蒼梧桂陽猾賊相聚攻郡縣賊衆而璇兵弱人心憂恐乃特製馬車數十乘以排囊盛石灰於車上繫布索於馬尾又爲兵車專設弓弩尅期會戰乃令馬車居前順風鼓灰賊不得視因以火燒布燃馬驚奔突賊陣因使後車弓弩亂發鉦鼓鳴震羣賊大駭破散追逐殺傷無數梟其渠帥郡境以清三遷爲渤海太守所在有異政以事免官尙書令張溫特表薦璇徵拜僕射請老以歸

張敦字伯仁浦江人爲諸暨令海寇二百餘人剽鹵爲患悉克平之

轉重泉令民悅其化累官至車騎大將軍

蔣邵字景倩浦江人爲益陽令遷洪撫二州刺史攘虎却蝗民蒙其惠轉交州刺史

傅柔字仲席浦江人爲宣城令無爲而治歌謠載路遷鄂州刺史

朱幼字長明義烏人仕南齊歷高辛平昌淮陽三郡太守遷揚州刺史兼度支使治楊有功人歌之曰朱幼渡江東人安盜賊空

陳脩字奉遷東陽人起家爲穀城令遷合浦太守大著治聲嘗以喪紀之法遍書于鄉使民知習卒于官合浦民懷其惠護喪歸葬

韓晏字德茂東陽人初舉孝廉遇盜于途鈔掠俱盡及行數里見車下有盜所遺縑追與之盜感嘆悉還所掠之物起家爲永寧令遷張掖太守後爲河南尹所至以仁惠稱

唐厲文才東陽人貞觀初爲道州刺史是時南土未靖荔浦之寇猖獗掠境文才臨郡期月羣盜悉平威愛甚著改容州刺史未幾辭歸鄉里卜居縣南以山水之樂自娛壽終于家

馮審字思退東陽人宿之從弟也擢進士歷官國子監祭酒監有孔子碑武后所立睿宗署額審請琢周著唐時論避之終秘書監

宋樓炤字仲暉永康人登政和五年進士第調大名府戶曹參軍遷尚書考功員外郎高宗在建康炤言今日之事當思古人量力之言察兵家知己之計力可以保淮南則淮南爲屏蔽權都建康漸圖恢復力未可以保淮南則因長江爲險阻權都吳會以養國力於是移蹕臨安擢右司郎中銓曹患員多缺少自倅貳以下多添差炤言光武併省吏員今縱未能損其所素有又安可置其所本無乎紹興二年召朱勝非爲侍讀罷給事中胡安國炤與程瑀等言勝非不可用安國不當責皆落職六年召爲左司員外郎尋遷殿中侍御史明年遷起居郎言今暴師日久財用匱乏考唐故事以宰相領鹽鐵轉運使或判戶部或兼度支今宰相之事難行若參倣唐制使戶部長貳兼領諸路漕權何不可之有內則可以總大計之出入外則可以制諸道之盈虛詔三省相度措置施行又言監司郡守係民甚切乞令

侍從官各舉通判資序或嘗任監察御史以上可任監司郡守者一
二人詔從之命中書門下置籍七年宰相張浚兄滉賜出身與郡中
書舍人張燾封還以命炤炤又封還乃命權起居舍人何禴書行於
是炤與燾皆請外以直秘閣知温州未幾除中書舍人尋遷給事中
兼直學士院九年以金人來和降詔肆赦其文炤具草也有日乃上
穹開悔禍之期而大金報許和之約割河南之境土歸我輿圖戢宇
內之干戈用全民命進兼侍讀除端明殿學士簽書樞密院事繼命
往陝西宣諭德意炤奏京城統制吳華死於范瓊知環州田敢成忠
郎盧大受死於劉豫乞賜褒恤以表忠義又奏陝西諸路有不從僞
命之人所在籍家產並勘驗給還炤至東京檢視宮室兼詣永安軍
謁陵寢遂至長安會李世輔自夏欲歸朝炤以書招之世輔以二千
人赴行在所賜名顯忠後卒爲名將又至鳳翔以便宜命郭浩帥鄜
延楊政帥熙河蘭鞏吳玠帥鳳翔還朝以親老求歸省于明州命給
假迎侍仍賜以金帶十四年以資政殿學士知紹興府過闕入見除

簽書樞密院兼參知政事尋爲李文會詹大方劾罷與祠起知宣州徙廣州未行而卒後賜諡襄靖

吳傳字清叟浦江人登宣和三年進士歷官至監察御史四持憲節廉明之聲甚著初州縣官遇賜燕有飲至夜分者傳奏不許見燭上許之

傅雱浦江人多膽略遇事奮發有爲與李綱宗澤遊建炎元年黃潛善建議與金講和白遣雱爲祈請使進階宣教郎未行李綱爲上言今日之事正當枕戈嘗膽內脩外攘使刑政修而中國強則二帝不俟迎請而自反不然雖冠蓋相望卑詞厚禮恐終無益今所遣使但當奉表兩宮致思慕之意而已乃改命周望爲通問使而雱副之上命李綱草二帝表付雱以行獻二帝衣各一襲且致書於粘罕雱與王倫俱留軍中久之乃歸官至工部侍郎

蘇簡字伯業其先眉山入父遲文定公轍長子也建炎初知婺州奏減和買羅額二萬八千民爲立生祠因留家焉簡以祖蔭補承務郎

累官直秘閣帥廣東措置海盜有方除直徽猷閣遷龍圖閣直學士
卒所著有山堂集

賈廷佐字子野其先真定人博學多聞剛毅有大節宣和二年入太
學會金人犯闕隨父淵扈蹕南渡遂家于東陽登紹興二年進士除
左迪功郎嚴州桐廬縣主簿時金遣使張通古偕王倫南來以詔諭
江南爲名廷佐一再上書累數千言劇論讐恥之不可忘名分之不
可貶和約之不可信請誅王倫拘虜使決意用兵其詞旨剴切大略
與胡銓同以官卑適不爲秦檜所忌幸免竄逐累官大理司直通判
湖州台州遷詳定一司敕令所刪定後知處州遂致其事卒贈朝奉
大夫所著有善願集愚齋雜著若干卷今祀本府鄉賢祠曾孫昉之
字成甫幼穎悟日記數千言從永嘉諸老遊嘉泰中登進士仕終台
州黃岩令所著有柳齋集及記纂淵海

徐良能字彥才蘭谿人紹興五年登進士歷知宿松安吉二縣皆有
惠政其在宿松撫流亡勤勸課不以土產供餽遺前政私增俸給盡

削去之吏白舊例所當得則曰此贓也爾欲以是餌我耶聞者皆服其廉及爲安吉賑艱食之民除木炭之賦民感其惠爲之繪像祀于學宮及刻石以紀其政去之日衆爭致贐一無所受待次家貧至鬻產以供給處之泰然以薦起爲御史檢法官繼除太常博士首陳預謹邊防精擇守令虔恭祭祀三事由監察御史遷殿中侍御史給事中久在言職凡所開陳皆當上意以疾在告除龍圖閣待制以終有雜著若干卷藏于家

范溶字茂實蘭谿人賢良浚之兄也以祖謬任爲太廟齋郎歷司理士曹知歷陽武康二縣權通判饒州溶練熟吏事決讞詳明三爲刑官再治邑皆以平恕稱在澶淵日有毆婦人傷重者四十九日而婦人死溶曰破骨法限五十日而創傷辜不踰月今四十九日矣脫不破骨能無冤乎生固不容剔肌以辨今死且腐骨可驗也驗之實止創傷遂得不死武康父老訴前令物力溢故額科輸不前欲更之吏白板已上郡須三歲可改溶曰是困吾民一日不可可三年乎立除

其十之二繼列其弊白于郡追易前板民利賴之及在饒州值旱災徧走羣望竭力禱雨因得疾卒

葉衡字夢錫金華人紹興十八年進士調福州寧德縣主簿以獲鹽寇功改秩知於潛縣戶版積弊富民多隱漏貧弱困於倍輸衡定爲九等自五以下除其籍而均其額於上四等貧者頓蘇徵科爲期限榜縣門俾里正諭民不遺一吏而賦自足歲旱蝗不入境治爲諸道最以政績聞召對擢知常州時水潦爲災衡發倉粟爲糜以食飢者或言常平不可輕發衡曰儲蓄正備緩急可視民飢而不救耶衡單騎命醫藥自隨徧問疾苦活者甚衆除太府少卿合肥潁河有淤田四十里衡奏募民以耕歲可得穀數十萬蠲租稅三年後阡陌成倣營田法官私各收其半從之除戶部侍郎時鹽課大虧衡奏年來課入不增私販害之也宜自煮鹽之地爲之制司火之起伏稽竈之多寡亭戶本錢以時給之鹽之委積以時收之擇廉能吏察之鹽之私販自絕矣丁母憂起復知廬州未行除樞密都承旨奏馬政之弊宜

命統制一員各領馬若干匹歲終計其數爲殿最李垕應賢良方正對策近許直入第四等衡奏陛下赦其狂而取其忠足以顯容諫之盛乃賜屋制科出身有言江淮兵籍僞濫者詔衡按視賜以袍帶鞍馬弓矢且命措置民兵咸稱得治兵之要尋遷戶部尙書進簽書樞密院參知政事衡奏二事一牧守將帥必擇才以稱其職必久任以盡其才二令戶部取湖廣會子實數盡以京會立限易之上皆從焉拜右丞相兼樞密使賜坐從容講論機密或不時召對一日曲宴宰執於凝碧池上曰自三代而下至於漢唐治日常少亂日常多何也衡奏聖君不常有周八百年極治稱成康而已上曰朕觀無逸篇周公爲成王歷言夏商周之君享國長久真萬世龜鑑衡奏願陛下常以無逸爲龜鑑社稷之福上又言朝廷所用正論其人才如何不可有黨如唐牛李之黨相攻四十年緣主聽不明至此文宗曰去河賊易去朝中朋黨難朕常笑之衡奏文宗優游不斷故有此語陛下英明聖武誠非難事御寶寔封令與臨安府寶思禮改合入官衡奏選

人改官非奏對稱旨則用考舉磨勘一旦特旨與之非陛下愛惜成
法之意上亟收前命因薦司諫湯邦彥使金邦彥恨衡擠已奏衡對
客有訕上語上怒即日罷相責授安德軍節度副使郴州安置未幾
復官與祠卒贈資政殿學士衡負才足智由小官不十年至宰相進
用之驟未有如此比云

厲汪字萬頃東陽人登隆興元年進士嘗簿永嘉宰樂清民以厲佛
子稱之積官至西外宗丞卒子模以蔭入官五更麾節所至著稱累
贈汪至中奉大夫

喬夢符字世用東陽人從學呂祖謙嘗作不欺論祖謙奇之登淳熙
二年進士知歙縣有大達當水衝居人歲苦霖潦夢符爲築堤鑿渠
人免水患號喬公街後守潮陽會宰相薦士二十九人以夢符爲首
改與六院差遣尋除大理正奉旨鞠郭倬獄于宿州不畏權勢獄具
進監察御史卒所著有西峴類稿十卷

楊大法字元範武義人登淳熙二年進士授知龍游縣累遷至監察

御史時四方多水旱疏論三事一曰民訴災傷不可疑其不實二曰減放租稅當使民被寔惠三曰禁遏糴使穀粟流通尋除殿中侍御史冬雷繼以淫雨上封事推明天人之理乞法孝宗敬天治國以自警省除侍御史兼侍講乞置言事官章簿以備燕覽內侍鄧彰等指使毆人至死奏行法當自近始乞付有司以竟獄事除國子祭酒兵部侍郎請外除集英殿修撰知鎮江府乞祠以華文閣待制提舉江州太平興國宮卒贈中奉大夫在言路所上凡六十餘奏言皆剴切有益於時嘗與朱文公遊往還詩簡甚多所著有易說

潘燾字無愧蘭谿人以祖任補官仕至中大夫直秘閣廣南東路經略安撫使其權知邵州日朱子安撫湖南與周必大聯章薦之稱其以問學持身以文雅諭吏不鄙夷其民政先教化崇學校祠先賢民有訟諭之以理敏於決遣囹圄屢空雖湖北猺寇犯邊而處置得宜民用安堵其爲大賢所稱如此

葉介字方叔武義人淳熙八年進士歷官通判邵武軍泉州南海寇爲

亂介召軍將密授方略出其不意悉擒之後以奉置大夫主管台州
崇道觀卒

章徠永康人淳熙甲辰進士歷官右文殿修撰時陳賈議貶道學徠
與劉光祖極論道學之正光宗嘉納及趙汝愚爲相徠復與章穎抗
疏劾韓侂冑專擅坐罷官歸寶慶間召爲宗正少卿兼侍讀卒贈少
師所著有疑塵集

孫昶字居敬東陽人淳熙十四年進士第三人累遷大學士時寧廟
拱默昶奏對慷慨亟蒙褒獎且諭大臣擢用遷博士進監丞會京尹
辱武學生不以其道昶抗疏爭之不報請外知濮陽軍六館之士傾
城出餞都人以爲美談尋知黃州憲湖南所至皆有善政嘗書眞實
心地簡徑法門八字於座此昶之所自得也仕終兵部郎官所著有
畸庵集及大學講義子德之一名道子博學善屬文舉進士中宏詞
科仕終秘書丞所著有續東萊大事記

葉綦字實之義烏人父維休伯父維芑連擢進士第綦以世科累遷

太常寺主簿輪對言中書政本宜清心虛已以求賢爲務時宰不樂改軍器監丞差知荆門軍建堡柵開溝洫蒐練民兵人思奮厲會京帥幕議築城東蒙兩山之顛蔡以山無水泉且條其不便者六制置使趙方主先八之說不從蔡嘆曰敝民誤國寧有去耳遂解印綬歸有旨除夔州路轉運判官俄復與祠結廬東山扁曰抗雲祠滿差知武岡軍未上卒子由唐見名儒

石範字宗卿浦江人天資穎茂從呂祖謙遊學殊精切中紹熙元年進士調奉化尉歲飢貧民爲變範賑之不誅一夫而定海寇爲害設計捕而殺之再遷知婺源縣縣有月椿錢二萬皆取之民民患苦之範建請蠲其十之二權通判袁州洞獠弄兵衡潭贛吉四州被禍尤酷袁當其衝人情凜凜範攝州事練軍旅閱民兵廣儲蓄博訪守禦之策威聲甚震洞獠不敢近轉通判泉州兼南外宗正卒範守正不撓初爲尉時或勸其謁權貴人美官可立致範曰吾儒者改官爲縣亦固當爾何以僥倖爲卒不詣士論多之